

濟源縣志

序

蓋聞輜軒問俗太史於以採
嵐因革異宜職方但期考信
兩部居州次門類實繁考古
証今見聞不一惟遵法在於
率舊斯踵事可以增華夫莫

高匪山峻極而尊崇者為嵩
為岱有孚習坎奔騰而浩瀚
者若江若河雞鳴日觀有奇
峯名俱特著樾浪鯨波成巨
浸瀆則稱宗然碧岫青岩游
屐難誇小魯抑負舟利物

觴豈盡靈源粵考燕川舊為
原國崖分角亢地屬懷而野
宿懸殊境界冀并縣始秦而
歷多析併漢晉名因沁軹舊
治堪稽隋唐邑號濟源今城
乃建顧其名而思其義稱謂

攸宜沛其澤而廣其施遐邇
胥賴蓄藏於天壇之谷莫能
溯所自来始見於太乙之池
未嘗見其盈竭伏流百里二
源湧出於原城匯作千倉獨
行直趨於渤海以故列為四

潰之一爵等諸侯因之崇以
歷代之封禪明祀典以為川
之效靈如有本原泉究皆
山之綿亘所為永撐地軸車
蓋聳如王屋日出見於夜分
天壇建自軒轅霞彩時垂倒

影左日精右月華銳凌霄漢
前華蓋後五斗列若屏扆清
虛為第一洞天猥云小有御
愛實萬年虬榦久受榮封至
若太行迤邐而東趨勢如旋
蛟大河紆迴而南繞不假隄

防沁水走龍蛇資其利者四
國郅原雄鎖鑰扼其要者重
關山川之勝概既多非徒以
供瞻眺風俗之敦龐近古尤
足以見人文爾乃地以人傳
於盧則有玉泉於李則為盤

谷景因詩見傑作多於唐宗
雅歌數見元明名宦首重房
陳歷代循良接踵鄉賢不徒
徐傳

熙朝人望繁多忠孝乃閭氣特
鍾寧必捐軀刳股節義為清

時雅化允皆高行貞心戶蓋
丁增見

聖世生聚栽培之厚荒開糧擴
誠有司勸勤策惰之能堤防
渠道之必興非實政實心何
足以永資利益彰善癉惡之

俱實惟是乾是惕斯有以化
導愚頑凡茲舊乘敷陳罔不
採經而據傳况經前賢訂政
何妨挹彼以注茲第纂編在
仁廟之初年風土人情歷久已多
變易適檄飭奉

上憲之公牘紳衿士庶詢謀
遂爾僉同植學媿雕蟲才慚
積玉錢穀簿書之鹿、未便
搯觚風塵酬酢之紛、何從
搦管爰聘高賢於越右東陽
俊彥經筵素號便、
謂沈更

濟源縣志 序

六

求碩德於鄰封中立才華錦
字共欽灼、
謂楊經赤奮攝
提之寒暑為綱為紀牙籤早
已犀分迨執徐荒落之冬春
載校載讐梨棗爰開剖劂審
慎於公餘之暇而魯魚亥不

之必嚴考核於節目之微而
參互考訂之期當沿革溯所
自始建置各按其時而疆域
山川瞭如指掌養民水利為
先造士學校為重而職官人
物燦若列星懿行重為表揚

未遺寒儉藝文摘其藻采不
掩英華所欣攻藉他山可析
疑而質信更賴邦多君子資
博採而旁搜方今

聖治日隆允矣時維化洽况復
皇恩遠播休哉惠澤光昭

各憲體愛育之仁惟期實踐
有司任撫循之職豈尚虛文
則百里非遙利貴興而害貴
除寧祇空言紙上羣黎在念
老宜養而少宜育何能盡載
篇中謹勉步夫前塵敢邀虛

譽庶有徵於信史願質大方
音

乾隆二十六年歲在辛巳仲
春之吉濟源縣知縣皖江蕭
應植撰



玉川志舊序

濟源舊有志載輯於天順七年于時事艱於創始諸
或載而未詳詳而未覈矧歲遠時遷簡帙益殘其于
世風之丕變人物之挺出文章之創作規制之鼎新
舊本弗克繫之也夫濟爲汴西首封朝宗勝槩其川
嶽靈異降生英傑若漢之四皓唐之張裴盧李宋之
三陳磊落竒偉誠有超於河北諸邑者志可弗脩修
可弗詳詳可弗覈乎予自己未夏承乏茲土欲更而
新之以允奪且愧才之弗逮是年莫春入覲還謁聖
會講於明倫堂因托筆於余吳王三公復分採於通

濟源縣志

舊序

庠士夫及鄉耆之諳達者閱數月而脫藁矣適彥博
司公以署庠來從而參伍古今彙括記傳以世風則
有紀以人物則有稽以文章則有集以規制則有考
據載而詳詳而覈謂不有裨於舊志矣乎因重梓之
爰序於廉公堂

嘉靖壬戌歲黃鍾月朏四日黔南李資元書

濟源縣志舊序

濟源古王屋東周畿內地也山川領袖懷孟其風髣髴魏唐守原出陽城而散見于左國竹書諸編而其乘不傳自隋文帝溯禹功于導沁縣治始因濟以名厥後泉甘土肥喬木畫圖唐韓宋蘇之所健羨襟隱逸而景儒宗今猶振響山水間使秦漢以來文獻足徵則聲名文物與玉川雲霞之氣相蒸蔚當不啻寥寥載籍者志之所係固不重與 大司馬中丞賈公家世龍門羹牆良史秉鉞下太行時已括形勝于羣嶺而檄郡縣纂圖籍尤欲周覽西北徼以全天中大

濟源縣志

舊序

業時明府辜公甫任惟寇孽燎原之後不憚遣一版爲難越明年延學博石攻玉孝廉許士造等肆力擔撻乃得舊志二卷創自明之天順脩于嘉靖末屬余潤色以成余覽而病之如叙山川而以浙中天台爲天壇置龍潭泚水于濟溪之外叙人物而以名宦陳秦國爲首陶人郭太爲號公之類紕繆頗多然當年旣懸之邑門改絃而鼓勢固不能勦說與雷同抑不敢且由嘉靖至今荒唐垂百載而欲以里居之實味續不朽母乃速官謗茲邑人士羞雖然一邑猶冢也冢有譜傳自宗老掌記殘缺罪在我後之人

國朝版章再造方將廸十數年生聚廢歌唐宋遺風而此
令杞宋興嗟如臣誼何爰是遐稽旁蒐綜爲十類弁
跋以數言有昔闕而今備者武秩武科封廕之尊
王制是也有昔詳而今畧者坡嶺溝澗泉石八景之從大
體是也有昔散佚而今裒輯者山川之外綴以古蹟
人物之後彙以叢志是也名宦鄉賢諸大典率遵先
輩何文定公郡乘例其餘凌雜未鹽多取衷於舊志
乃未脫藁而辜公以病告別駕全公來視篆抑又出
入師虞三閱月昉府胡公至勒限殺青余不獲已乃
卽以是報 中丞公命

濟源縣志

舊序

二

皇清順治十七年相月穀旦

賜同進士出身原任廣東道監察御史邑人劉漪撰

濟源縣志序

天下之故因革而已矣當其革者不言因當其因者不復言革因革之端循乎自然天地且不能違而況於人乎損益者所以善因革之用者也損之益之迹似乎革然不過損之益之而已其實皆因也昔孔子論三代之禮言因而不言革而損益之權神乎其間所謂百世可知者知之以其禮而已矣知其禮之所以損益者而已矣禮徵諸載籍而史氏之職以重故古者天子有史官諸侯亦各有國史掌記其國之大事小事書之簡策以備損益之用若晉之乘楚之檮

濟源縣志

序

一

祝魯之春秋皆史也秦并諸侯置郡縣於是列國之史止而郡縣之志作志亦史也漢高祖入關先收秦圖籍以此得周知天下阨塞戶口多寡強弱之處前漢郡國計書先上太史後上丞相後漢公卿家乘始集公府後上蘭臺是郡國之志乃一代之史書所由本而損益所由出也志固不重哉孔子曰吾志在春秋行在孝經又曰我欲載之空言不如見之於行事之深切著明也而左氏曰春秋之稱志而晦夫志以章物蓋言顯也而反謂之晦將物之顯者易於晦者難明其旨遠其辭微文見於此而起意於彼

謂之晦歟抑在上者操損益之權故其事明在下者
存損益之旨故其志晦歟然而志難言之以言天道
則星野次焉以言地道則疆域分焉以言人道則賢
否判焉以言神道則祠祀秩焉以至紀山川而覽往
蹟若物性而奠民居審機祥而定賦稅考風會而稱
著述古今氣運之淳澆賢才之盛衰政事之得失咸
憑文人三寸之管以上下其間不亦難哉濟舊有志
一脩於天順癸未再脩於嘉靖壬戌增脩於順治壬
寅今

大中丞閣公撫豫之三載政舉人和百廢俱起復畱心

濟源縣志

段序

二

中原文獻徵大河南北郡邑博採典章搜羅遺佚將
彙爲一代成書而溫陵尤公乃以其事屬余余遜謝
至再不獲已乃退而思曰一邑之志非一邑之志而
實一代之史則一邑之志非一人之文而實天下之
文也以天下之文章譔天下之故實而我無與焉其
亦可矣天順嘉靖二志尚屬草創而其書已不得見
僅存其序壬寅一編遐稽旁搜謂較前志爲大備然
濟源角亢分野而誤從室壁則於天道容有可商漢
書地理志波有絺城左傳曰王與鄭絺水經注溟水
又東北遷波縣故城北明卽其地而引爲汲縣廢地

則於地道容有可考人物捨角里先生而首徐有功
又張禹郭文徐有功張廷珪溫造裴休皆有本傳而
概未登則於人道容有可議五嶽四瀆國之大祀祭
典宜專濟瀆乃先通祀而後濟瀆則於神道容有可
叅夫觀天察地敬人事神乃綱紀之大者而尚多差
缺然後益歎作述之難而從事者之不可以苟焉而
已也於是晝訪名山夜翻青史不揣固陋謬有損益
要亦皆時至事起增乎其所以不容不增減乎其所以
容不減因其已然而無所容心於其間是或可以告
無罪焉爾若夫前後論序惟抒己意未遑計其工拙

筆削未精以竢後之君子獨是王屋名山濟瀆大川
名山大川之間當有賢人者出佐

聖明以損益天下明千百世不弊之道而恨未之見也余
於纂脩之餘益不勝掩卷而遐思云

時

康熙二十九年歲在庚午孟冬初吉

賜進士出身前知四川順慶府南充縣事邑人段維衷撰

續脩濟源縣志序

縣志一書有關治教雖所載不越提封四境之中然自數千百年以來陵谷變遷風俗移易人文盛衰悉係於此膺纂修損益之任者苟搜羅不廣詢訪未周則紀載失立亥豕終誤雖將文飾簡編華而不實盛衰得失之辨民風土俗之宜山水人文之運茫無攷據復何補於治教哉濟源縣志修於我

朝順治己亥庚子間固去今未遠也所以詳畧異同未稱醇史者蓋因所得遺稿乃天順嘉靖間草創之文上下百年灰燼缺畧其疵謬疑誤已不可問矣若非

濟源縣志

黃序

前人臺諫劉公史裁博雅門闕析疑備詳畧以垂考據則今日雖欲續脩增美抑又難於摸索耳近歲庚午

大中丞閻公節鉞中州化洽時雍因欲重脩省志以昭文物之盛遂遍檄守令纂輯舊志維時前令尤公應運延邑紳秦州使君段先生暨嗣君南充段明府共董總脩纂脩之任甫脫稿適

中丞閻公移撫黔中未經質成及再奉

大司馬中丞顧公命而前令尤公又復陞任寧紹邑紳段先生喬梓先後凋謝矣應中以甲戌仲春甫蒞濟

邑下車之日環視四境但見太行如屏黃河如帶濟
沁遶東郭之流西山據西河之險形勝壯麗今古名
區也然而荆棘弗剪煙火未稠黎元猶瘠豈亦今古
同然歟因翻閱邑乘見有新舊二稿舊者既多缺畧
同異難稽新者亦復瑕玼大雅未備因延訪紳士始
知邑志一書奉檄纂脩已經五載而從事是役者僅
及兩旬耳夫以急遽倉卒之間而盡括數千百年之
蘊欲其聯如貫珠潤如美玉庸可得乎哉獨惜老成
凋謝莫竟前功亟敦延昔同事參訂之邑紳璩君昆
季孝廉李君重脩前業博採旁搜山川辨其異同人

濟源縣志

黃序

二

物別以流品事畧其繁文採其實往復參酌疑義共
析迄於今夏而全書告成應中受而讀之仰而嘆曰
民社治教所關備于此矣夫濟邑形勝之美山川之
廣也山川之廣田野之隘也雖云濟水通和室麥然
僅東北一線耳餘皆崇岡複嶺石厚土磽苟人力天
功所不至則歲收常歉歲之歉民之瘠也况地接三
晉風遭流寇蹂躪之餘荆棘榛蕪荒烟滿目邇來數
十年生聚休息稍有今日所以事久功緩未躋全成
者蓋有由來矣今

聖天子丕治日隆文德丕昭聲教遠播尤加意黎元